

Ilinalathala ng Partido Komunista ng Pilipinas-Bagong Hukbong Bayan sa Rehiyong Bikol

REBOLUSYONARYONG
PANGMASANG
PAHAYAGAN
NG BIKOL

Taon XXXI Blg.2
Oktubre 30, 2007


EDITORIAL

Pangil ng Teroristang Rehimen

Sa pitong taong pasistang panunungkulan ng rehimeng Macapagal Arroyo, umabot na sa halos isanlibong aktibista at tagasuporta ng demokratikong kilusan ang biktima ng ekstrahudisyal na mga pamamaslang. Mahigit 200 ang dinukot at patuloy na nawawala. At mahigit isang milyong mamamayan ang biktima ng mga dislokasyon sa kanayunan ng Oplan Bantay Laya 1 at 2. Sa udyok ng amo nitong imperyalistang US at pagkaganid sa poder, linilipol nito ang mamamayan sa mapanalasang kampanyang anti-insurhensya.

Dagdag na lisensya ng rehimeng US Macapagal-Arroyo para dahasin ang mamamayan ang pagkakaapruba ng Human Security Act. Bahagi ito ng kontra-insurhensyang kampanya sa ilalim ng Oplan Bantay Laya 2.

Lalo lamang nitong pinasasahol ang lansakang pandarahas at pagsikil sa batayang kalayaan at mga karapatan ng mamamayan. Kinukundisyon nito ang isipan ng mamamayan para sa higit pang pasistang teror.



sundan sa pahina 2

Nilalaman

Oktubre 15, 2007

Pangil ng Teroristang Rehimen	p. 1
Isang Reportahe: Paghahanda ng Yunit ng Hukbo Laban sa SOT	p. 4
Artista ang Hukbo, Artista ang Masa	p. 6
Nakabalatkayong Armadong Panghihimasok ng Imperyalismong US sa Bikol	p. 8
Pasistang Tropa ng 9th IB, Nagtamo ng mga Kaswalti	p. 9
Misengkwentro ng SR at 22nd IB sa Masbate	p. 9
Mga Sibilyan ang Pinagbalingan ng mga Militar sa Catanduanes	p. 10
Kontrarebolusyonaryong Pulis, Pinarusahan	p. 10
Isang Iskwad ng 2nd IB, Inambus	p. 10
El Dore Mining Corporation, Pinarusahan ng Hukumang Bayan	p. 11
Diwang Rebolusyonaryo	p. 12
Batoy	p. 14

**LABANAN
AT BIGUIN
ANG
OPLAN
BANTAY LAYA 2!**

EDITORIAL

Lisensya ito para sa pagmamanman o pagsurbeylans sa mga organisasyong kinakategoryang "terorista" o suspetsadong "terorista". Lisensya din ito para arestuhin at ideteni nang mahigit sa tatlong araw ang sinumang suspetsadong "terorista", kahit walang pormal na nakasampang kaso. At maaaring ikulong ng habambuhay sa paratang na terorista. Naglalayon itong tuluyan nang busalan ang ligal na demokratikong kilusan at ang hanay ng lumalabang mamamayan.


Sa kabila ng malawakang pagtutol, nagpahayag si GMA na agarang ipatupad ang HSA matapos itong magkaroon ng bisa nitong Hulyo 15. Ito ang matagal nang sinusuka ng sambayanan na panukalang Batas sa Kontra-Terorismo, na pilit na itinutulak ng rehimen mula pa noong 2001.

Pag-aresto kay Kasamang Joma

Bahagi ng maruming taktika nito, sinulsulan ng US at ng rehimeng Macapagal Arroyo ang gubyernong Dutch para arestuhin si Kasamang Jose Maria Sison sa Netherlands noong Agosto 28. Malawakang kinundena sa loob at labas ng bansa ang pag-aresto at pagkulong kay Kasamang Joma, ang Senior Political Consultant ng NDFP sa usapang pangkapayapaan.

Sa pagkakaaresto kay Kasamang Joma, lalong lumawak ang simpatya sa kanyang mga pinapanindigang prinsipyo at adhikain mula sa mga demokratikong kilusan at anti-imperyalistang mga organisasyon sa iba't ibang panig ng mundo. Kasabay ding kinundena ang malawakang panggigipit at pagpaslang ng teroristang rehimen ni Macapagal-Arroyo sa mga aktibista.

Awtomatikong pinangalandakan ng mga tagapagsalita at upisyal ng AFP at PNP na maghahasik daw ng "terorismo" ang BHB upang ipaghiganti ang pagkakaaresto kay Kasamang Joma.



sundan sa pahina 3

Gasgas na ring linya nila na si Kasamang Joma daw ang lider ng CPP-NPA-NDF kaya sa kanya ibinibintang ang lahat ng naimbentong kasong kriminal para sa kanilang "teroristang pagbabansag". Lagi nila itong ipinapangalandakan gayong paulit ulit nang napawalang-saysay ang mga kasong kriminal na isinampa sa kanya sa Pilipinas. Noong 1986, na-clear na ang kasong rebelyon at subersyon; noong 1992 napa-walang bisa na rin ang 1988 kasong rebelyon; at noong 1994 naibasura na ang kasong multiple murder pagkat pawang haka-haka lamang ang ibinibintang sa kanyang pambobomba sa Plaza Miranda. At sa mismong sertipikasyon ng Secretary of Justice noong 1998, nakasaad na walang anumang kasong kriminal na nakasampa laban kay Kasamang Joma.

Taong 2003, nagsimula ang rehimeng Macapagal-Arroyo sa malisyosong pag-iimbento nito ng mga kasong kriminal laban kay Kasamang Joma at sa mga kilalang pinaghihinalaan nilang lider ng kilusan. Nito lamang Hulyo, nagdesisyon ang Korte Suprema na walang saysay (null and void) ang maling akusasyon ng rebelyon sa mahigit 50 akusado, kasabay ang anim na kongresista ng mga progresibong partylist, ligal na mga konsultant ng NDFP, at si Kasamang Joma.

Nitong Setyembre 13, pinalaya si Kasamang Joma ng Korte ng Dutch sa Netherlands, pagkat walang sapat na ebidensya sa mga ibinibintang sa kanyang kasong kriminal.

Sa desperado nitong pag-aambisyong lumpuhin ang rebolusyonaryong kilusan, maraming pinaghihinalaang mga lider ng kilusang rebolusyonaryo ang dinukot at patuloy na ibinibinbin ng berdugong AFP. Isa dito si Kasamang Rogelio Calubad, ang NDF konsultant ng rehiyong Bikol sa

usapang pangkapayapaan na dinukot ng mga elemento ng SOLCOM noong Hulyo 2006.

Pagkadiskaril ng Usapang Pangkapayapaan


Habang patraydor na ginigipit ang mga konsultant at istap ng NDFP sa usapang pangkapayapaan sa GRP, walang kahihiyang nagpapanggap ang rehimeng Macapagal Arroyo na interesado pa ito sa negosasyon. Katulad ng naunang mga pakana nito, wala itong ibang linya kundi ang pagpapasuko. Walang pinagkaiba ang ibinubuyangyang na amnestiya sa dating programang *Balik-Loob* at *Balik Baril* ng gubyerno na paulit ulit na pinagkakakitaan ng kuraptong mga upisyal sa AFP. Hiniling ng Malakanyang sa

Kongreso na laanan ng 500 milyong pisong badyet ang programa nitong amnestiya.

Mga sibilyang pinilit at nilansi ang kinukunan ng mga litrato para palabasing maramihang sumusuko ang mga kasapi ng BHB.

Isa sa bukambibig ng mga tagapagsalita ng 9th ID at *Civil Relations Service* sa AFP ang paghahabol sa isang lokalisadong peace talks sa Masbate. Kahibangan. Magiting na naglulunsad ng matatagumpay na taktikal na opensiba ang mga yunit ng Jose Rapsing Kumand ng BHB sa Masbate at mataas ang diwang mapanlaban ng hukbo at masa sa isla. At nananatiling buo at matatag ang kilusang rebolusyonaryo sa Bikol at sa buong bansa.

Lalong nasusuklam ang mamamayan sa hayok-sa-poder at pasistang rehimen at mas lumalawak ang hanay ng mamamayang tumatahak sa landas ng pagrerebolusyon. Pagkat ito ang landas tungo sa tunay, makatarungan at pangmatagalang kapayapaan at kasaganaan.



Isang Reportahe:

Paghahanda ng Yunit ng Hukbo Laban sa SOT

Huling bahagi ng 2006, tinukoy ang prubinsya ng Camarines Sur na kabilang sa prayoridad ng Oplan Bantay Laya II - ang kampanya ng rehimeng US-GMA upang durugin ang rebolusyonaryong kilusan hanggang 2010.

Sa isang bayan sa nasabing prubinsya, kagyat na bumuo ng kumprehensibong plano ang komiteng seksyon ng Partido at ang yunit sa gawaing masa ng BHB. Kailangang labanan ang nakaambang pasismo ng mga militar.

Tulad ng ibang bayan sa Camarines Sur, matagal nang kumikilos dito ang Hukbo. Dekada na ang binilang ng kanilang pakikipamuhay sa mga magsasaka. Mula sa kaliit-liitang problemang pampamilya ng masa hanggang sa organisadong pagkilos ng taumbaryo upang bawiin ang lupa mula sa asendero, katuwang nila ang kanilang pulang Hukbo.

Kasabay ng pagga-gawaing masa, maunlad na serbisyong medikal na rin ang nagawa ng mga kasama sa erya. Kundiman nakikitalok, makikita ang Hukbo na hinaharana ang mga taumbaryo ng mga rebolusyonaryong kanta. At sa bawat araw na pag-ikot ng mga kasama sa erya, nor-

mal nang tagpo ang mga pag-aaral ng mga kasama at masa sa lilim ng mga puno o kaya naman sa loob ng mga koprasan.

Nakaangkla ang mga ito sa sustinidong pagtatayo ng mga saligang organisasyong masa ng mga magsasaka, kababaihan at kabataan sa eryang saklaw ng Hukbo.

Bahagi ang lahat ng ito ng solidong pagpupundar ng demokratikong gubyernong bayan. Ito ang gubyernong pinapatatag ng masang anakpawis mula sa kanayunan upang tunay na mahawakan ang kapangyarihang pampulitika at pang-ekonomya.

At ang lahat ng ito ay nilalayong durugin ng kontra-mamamayang Oplan Bantay Laya II.

Hindi tutugot ang mga kasama at masa na magtagumpay ang kampanya ng rehimeng Macapagal-Arroyo. Diniinan ng kanilang plano sa pagharap sa OBL II at sa kaakibat nitong SOT ang malawakang kampanya sa edukasyon at impormasyon. Pinulong sa bawat barangay ang mga organisasyong masa. Ihinanda ang kanilang isip at diwang palaban sa mga tusong saywar at panlilinlang ng kaaway.

Maging ang mga suportang grupo at alyado ay ipinatawag at kinausap ng mga kasama. Mariing pinaalalahanan sila sa mga posibleng pananabotahe ng mga militar upang tumigil sila sa pagsuporta sa rebolusyon. Ipinaliwanag din ng mga kasama ang mga kongkretong hakbang na maaari nilang gawin upang hindi makuhanan ng impormasyon laban sa rebolusyonaryong kilusan.

Pinalapad ang gawaing alyansa hanggang sa mga taong simbahan, makabayang pulitiko at maging sa masmidya upang ihanda ang makinarya sa paglalantad sa mga pang-aabuso ng mga militar sa karapatang pantao. Nakita ng mga kasamang kailangang-kailangan ito batay sa karanasan sa ibang eryang nakaranas na rin ng SOT ng mga militar.



sundan sa pahina 5

Paghahanda Laban sa SOT

Dahil habang tumatahimik lamang ang mga tao sa panduduhagi sa kanilang karapatan, mas lalong nagiging mabangis ang mga teroristang armi.

Ang lahat ng susing masa at mga kasapi ng Partido sa baryo ay tinasa ang seguridad. Tinukoy kung sino ang maiinit na sa kaaway. At upang maiwasan ang pamamaslang ng mga death squad ng militar maging sa mga di-armadong kasapi ng rebolusyonaryong kilusan, hinikayat silang sumampa sa BHB. Ani nga ng isang kasama sa lokal, mas mabuti pang mamatay nang may laban kaysa paslangin na lamang ng patraydor ng mga berdugo ng kaaway.

Habang kinakayod ng Hukbo ang paghahanda sa masa at pagdedepensa sa sonang gerilya mula sa nakatak dang bigwas ng militarisasyon, mas lalong pinahigpit ang internal na konsolidasyon ng yunit. Hindi lamang mga pag-aaral pampulitika kundi maging pagsasanay militar ang ilinulunsad sa kanilang hanay. Mas diniinan ang pagiging handa sa pukpukang labanan kung kinakailangan, upang ipagtanggol ng BHB ang pulang teritoryo. Tinukoy kung sino ang maaaring pumapel na mga isnayper at haras tim. Kailangang paduguan ang kaaway sa bawat pagtapak sa sona.



Kailangang huwag bigyan ng katahimikan ang mapanlinlang na layunin ng SOT ng militar na "kunin ang puso at isip ng masa."

Kailangang hindi makabwelo ang mga berdugo sa kanilang pambubugbog, sa kanilang pananakot at panlilinlang, sa kanilang pangsasalbeyds, at sa kanilang pagpataw ng mala-sementeryong katahimikan sa bawat baryong kanilang ginagahis.

Isang araw nitong buwan ng Abril, dinumog ng mahigit isandaang militar ang nasabing bayan. Tatlong baryo agad ang sinaklaw ng SOT ng militar. Isinabay sa recon patrol ng mga kaaway ang tatlo pang mga kalapit na baryo. Agad na pinulong ng mga militar ang mga upisyal ng barangay upang pwersahing magtanod para sa kanila. Lahat ng taumbaryo ay pinakuha ng sedula, kahit ang mga kabataang nag-eedad pa lamang ng kinse anyos. At, maraming sibilyan ang tinakot sa pag-aakalang makakakuha sila ng impormasyon tungkol sa mga poste diumano ng BHB sa baryo.

Dalawang araw makalipas, inisnayp ng mga kasama ang mga nag-ooperasyong kaaway. Isang upisyal ang kumpirmadong tinamaan. Mas lalong na-ahita ang baseng masa. Tuluy-tuloy

ang pagpapa-abot nila ng kilos ng kaaway. Hindi nilisan ng yunit ng Hukbo



ang erya. Tuloy ang gawaing masa at pagpapasuntok sa hangin sa kaaway. Habang tulad ng inaasahan, dumagdag ang kasapian ng Hukbo mula sa masang mas nanaig ang diwang mapanghimagsik laban sa takot at pagiging pasibo.

Samantala, ang mga militar ay nangaduwag na nakopong na lamang sa ilang bahay sa sentro ng isang baryo. Maging ang pagkuha ng kanilang panggatong na kahoy at pag-igib ng tubig ay isinusuhol na lamang nila sa mga bata sa baryo.

S

ABANGAN

ang susunod na brodkas ng
Dagundong ng Bikol
Disyembre 2007

Artista ang Hukbo, Artista ang Masa

Ang Kilusang Masa sa Paggawa ng Pelikula

Malaking orgullo para sa mamamayan ang matunghayang tuwirang kabahagi sila sa isang proyekto na nagtatanghal sa kanilang mga karanasan at adhikain. Gayon ang namalas sa isinagawang syuting ng tatlong produksyong audio-biswal sa prubinsya ng Sorsogon nitong Hulyo.

Katuwang ang hukbong bayan at ang mga sangay ng Partido sa mga baryo, matagumpay na nailunsad ang pagkuha ng mga bidyu na bubuo sa mga produksyong audio-biswal. Unang syinuting ang labinlimang segundong patalastas hinggil sa pagpultaym ng isang disi-otso anyos na kabataang magsasaka. Sumunod naman ang bidyu dokumentaryo hinggil sa karanasan at paninindigan ng isang kabataan tungo sa pagsasampa sa hukbong bayan. Ikatlo ang pagkuha ng mga bidyu na bubuo sa produksyong naglalahad sa pagkalinga ng rebolusyonaryong kilusan sa kagalingan ng mga bata.

Bago pa man ang serye ng mga pagbidyu, nauna nang pumakat ang mga kasamang hukbo na makakatulong sa produksyon upang tipunin at pagkaisahin ang mga gaganap. Sapol ng mga kasama at ng taumbaryo ang kahalagahan ng pagkakaroon ng mga produksyong nabanggit. Una na, pinapahigpit ang

pagyakap ng masa sa rebolusyonaryong kilusan dahil sa ipinapakitang pag-aaruga ng kilusan sa mga bata at kabataan. Dagdag pa rito, pinapabulaanan din ng mga produksyon ang maruming propaganda ng kaaway na ang NPA umano ay nagrerekluta ng mga batang mandirigma.

Halos araw-araw na rumeregrup sa mga kasama ang mga batang kalahok sa ikatlong produksyon. Karamihan sa kanila ay mga estudyante sa elementary sa magkalapit na barangay. Matapos ang iskwela ay diretso na sila sa bahay na binabasehan ng mga kasama upang magpraktis ng kanilang mga pangkulturang pagtatanghal na itinatampok din ng isa sa mga produksyon. Punung-puno ng sigla at militansya ang diwa ng mga munting artista sa mga panahon ng kanilang pagpraktis. Kalugud-lugod ang husay at disiplina ng mga bata habang kinakabisa at pinipino ang kanilang mga linya, mga malikhaing galaw at sayaw na paborableng itanghal sa anumang lokasyon, sa bakuran man ng masa o sa kalsada.

Sa kanilang mga murang edad ay litaw na litaw na ang tapang at talas ng isip. Sa mga paglalaro at huntahan sa pagitan ng mga pagpraktis ay ipinamamalas naman ng mga bata ang kanilang pagharap sa mga militar tuwing may sakyada, at ang kanilang

mga kuwento ay nagsasalaysay ng kanilang pagpanig sa uring api at sa kilusan. Bawat araw na inilalagi nila sa piling ng hukbo ay kinatatampukan ng higpit ng relasyon ng mga kasama at ng mga bata sa baryo. Sa esensya, ang mga tagpong ito ang nais itanghal ng produksyon.

sundan sa pahina 7



Samantala, hindi rin naging malaking hadlang ang dalawang ulit na pag-operasyon ng kaaway sa sona. Bahagya lamang naantala ang pagsyuting at naghanda ang mga kasama sa sitwasyong militar. Sa muli, kabahagi ang taumbaryo sa pangangalaga sa kanilang hukbo. Sunud-sunod ang mga paabot ng masa hinggil sa lokasyon at direksyon ng kaaway kung kaya't napanghawakan ng mga kasama ang kalagayan. Pansamantala ring nanatili sa kanilang mga bahay ang mga bata at naghintay ng kanilang muling pagregrup sa mga kasama matapos magsiuwian ang mga militar na bigong atakehin ang hukbong bayan.

Matapos ang takdang panahong inilaan sa unang baryo, lumipat sa kalapit na barangay ang mga kasama upang doon naman ibidyu ang mga nalalabi pang eksena. Naghihintay na rin doon ang mas malaking buldo ng mga kasama na siyang itinakdang magiging karagdagang balon ng mga artista. Doon na rin naghihintay ang taumbaryo na lalahok sa malaking eksenang kukunan. Sa muli, naging madulas ang pagdaloy ng mga gawain. Muling pinagkaisa ang bagong bats ng mga artistang hukbo, kinatulong ang sangay, at ihinanda ang taumbaryo. Partikular sa bagong bats ng mga artistang hukbo, matagumpay na pinangibabawan ng mga kasama ang kabalintunaan ng kanilang magiging papel. Bagamat hindi madali para sa kanila ang umarte bilang mga pasistang militar na kinamumuhian ng masa, sinikap ng mga kasamang panandaliang isalarawan ang pagiging marahas na instrumento ng estado sa pagsugpo sa rebolusyon. Ngunit matapos ang ilang oras na pagpapanggap bilang mga militar, hinubad ng mga kasama ang kanilang mga kamuplads at

pinanumbalik ang tunay na larawan ng hukbong bayan.

Habang kinukunan ang mga tagpong nabanggit ay handa na rin ang loob ng taumbaryo upang isagawa ang huling eksenang ibibidyu. Pinangunahan na ng sangay ng Partido sa baryo ang pagpapaabot sa taumbaryo upang maghanda sa eksena ng paglikas. Agad na napalis ang agam-agam ng taumbaryo hinggil sa usapin ng seguridad nang ipaliwanag ng mga kasama na hindi kukunan ang mga palatandaan sa baryo upang maiwasang malantad sa kaaway ang lokasyon ng barangay.



Sa takdang oras, dumating sa mismong sentro ng barangay maging yaong nasa malalayong sityo upang makibahagi sa eksena ng paglikas. Nag-inisayatiba na rin ang karamihan na dalhin ang

kanilang mga kagamitan sa bahay upang lumitaw na mas makatotohanan ang kanilang isasagawang eksena. Sa ilang saglit, nagmistulang nilukob ng teror ang pangunahing kalsada ng barangay nang humugos ang mga batang bitbit ang mga buntan at karton ng damit, mga nanay na kilik ang kanilang mga sanggol, mga tatay na pasan ang kanilang mga bigasan at kasangkapan, at mga nakatatanda na labis din ang pagmamadali. Sa gitna ng pag-aapura ng taumbaryo ay nakatanod ang mga nakakamuplahe na nambubulyaw at nananakot sa kanila. Sa loob ng dalawang kuha ay idineklara ng mga kasamang nagbibidyu na mahusay ang pagkakaganap ng mga artista. Malaking salik sa makatotohanang paggampan ang tunay na karanasan sa paglikas ng taumbaryo nang maglunsad ng operasyon ang AFP ilang taon na ang nakaraan.

sundan sa pahina 8

Nakabalatkayong Armadong Panghihimasok ng Imperyalismong US sa Bikol

Ayon sa pahayag ng NDF-Bikol, hungkag at mapanlinlang ang RP-US “humanitarian mission” ng tropang US na isinagawa sa lalawigan ng Albay noong Hunyo 26 hanggang unang linggo ng Hulyo.

Ang tunay na layunin ng mga tropang Amerikano ay magsagawa ng aktwal na pag-survey sa mga dagat, pantalan, kalupaan, at mahahalagang instalasyong pampubliko bilang paghahanda sa balak nitong pagpapatindi ng armadong panghihimasok sa bansa sa tabing ng “military exercises” na gagawin sa susunod na mga taon, paliwanag ni Ka Greg Bañares, ang tagapagsalita ng NDF-Bikol.

Binatikos din ni Ka Greg ang pagpapanggap na “matulungin at makatao” ng imperyalistang US. Sa tulong ng papet na gubyernong Arroyo at AFP, tusong sinasamantala ng imperyalismong US ang kahabag-habag na kalagayan ng mamamayan ng Albay na sinalanta ng nakaraang mga kalamidad upang magpanggap na “matulungin at makatao” sa kabila ng katotohanang ang mga imperyalistang patakaran sa ilalim ng “globalisasyon ng malayang pamilihan” ang tunay na naglugmok sa kabuhayan di lamang ng mga Bikolano kundi ng buong sambayanang Pilipino.

Kasuklam-suklam ang pagpapanggap na makatao ng tropang US gayong ang patakaran nitong “gera kontra-terorismo” ang dahilan ng kamatayan ng daan-daang libong mamamayan kabilang na ang mga bata at kababaihan sa Afghanistan at Iraq, at ang dislokasyon ng milyon pang iba dahil sa digmang agresyon ng US sa mga bansang ito, paglalantad pa ni Ka Greg.

Ayon pa sa NDF-Bikol, hindi rin dapat kalimutan na inengganyo at sinusuportahan ng

“gera kontra-terorismo” ng rehimeng Bush ang mabangis na Oplan Bantay Laya II na iwinawasiwas ngayon ng berdugong rehimeng Arroyo laban sa mamamayang Pilipino. Aabot na sa 1,000 ang biktima ng “extra-judicial killings”, pagdukot at pagkawala ng ilandaang aktibista, at libu-libo ang biktima ng pag-abuso sa karapatang pantao.

Ayon pa kay Ka Greg, walang kahihiyang inilalatag ng papet na gubyernong Arroyo at ng AFP-PNP ang pulang carpet sa mga dayuhan at ginagamit ang “humanitarian mission” upang pagtakpan ang karumal-dumal na mga krimen na bunga ng pagpapatupad ng patakarang “gera kontra-terorismo” at Oplan Bantay Laya II laban sa mamamayang Pilipino.

Binabalaan ng NDF ang mga tropang Amerikano na huwag gamitin ang “humanitarian mission” upang maniktik sa mga saklaw ng sona at baseng gerilya at direktang lumahok sa mga operasyong pangkombat ng AFP at PNP sa saklaw ng teritoryo ng Demokratikong Gubyernong Bayan upang hindi sila maging target ng pag-atake ng BHB. Magpapatupad ang BHB ng aktibong pagdi-depensa sa mga saklaw nitong teritoryo.

Binanggit din ni Ka Greg ang napatunayang maruming taktika ng 901st Brigade-AFP na paggamit sa relief operations sa patraydor na pag-atake sa isang yunit ng BHB na tumutulong sa mga biktima ng pagputok ng bulkang Mayon, at ang ulat na natanggap ng NDF-Bikol na may ilang personel at sundalo ng US na direktang lumahok sa operasyong pangkombat ng 902nd Brigade sa kagubatan ng Lupi at Ragay sa Camarines Sur noong taong 2003.

S

Artista ang Hukbo, Artista ang Masa


Sa kauna-unahang pagkakataon sa mga baryong ito sa Sorsogon, tumampok ang likas na galing ng masa at hukbo sa pag-arte sa pelikula. Lumitaw ang likas na talino ng hukbo sa pagdidirihe ng mga eksena. Sa inaantabayanang produksyon, itinatanghal ang hukbong bayan at ang masa sa isang produksyong tampok ang

kanilang mga karanasan at adhikain, at ibinabandila sila bilang mga artista. Testamento ito ng katumpakan ng kulturang ipinapalaganap ng rebolusyonaryong kilusan na siyang magkokonsolida sa hanay ng hukbo, magpapahigpit sa kapit ng masa sa rebolusyon, at bibigo sa kaaway sa kanilang kontra-rebolusyon.

S

Pasistang Tropa ng 9th IB, Nagtamo ng Mga Kaswalti sa Masbate

Masbate — Apat ang namatay at apat ang sugatan sa mga militar sa serye ng mga isnayp at haras na isinagawa ng mga yunit ng Jose Rapsing Kumand laban sa nanalasang mga operasyong militar sa isla. Dalawang upisyal ng 9th IB ang namatay. Aktibong depensa at opensa ang naging pagharap sa kaaway kaya walang kaswalti sa hanay ng BHB.



Bandang alas-tres ng hapon, inisnayp ng mga pulang mandirigma ang SOT ng 9th IB na nag-ooperasyon sa Brgy San Jose sa bayan ng Uson noong Hulyo 7. Namatay dito ang isang elemento ng Philippine Army. Inisnayp ang nabanggit na platoon ng 9th IB habang nagsasagawa ng anti-komunistang pulong-pulong sa baryo.

Magkasunod namang isinagawa ng BHB ang isnayp at haras laban sa mga nag-ooperasyong militar sa Brgy San Antonio sa bayan ng Milagros noong Hulyo 13.

Nasugatan ng mga bala mula sa isnayper ng BHB ang dalawang elemento ng Philippine Army.

Kasunod nito, alas-syete kinagabihan nang muling hinaras ng BHB ang mga nag-ooperasyong militar. Isang elemento ng Philippine Army ang namatay sa pinangyarihan, at namatay ang isa pang army habang iniaatras ng kanyang mga kasamahan. Sugatan ang dalawa pang militar.

Alas-tres ng hapon din ng muling hinaras ng BHB ang tropa ng 9th IB sa Brgy Cagay sa Masbate City noong Hulyo 15. Namatay dito ang isa pang elemento ng Philippine Army.

S

Misengkwentro ng Scout Ranger at 22nd IB sa Masbate, Maraming Kaswalti

Kinumpirma ng Jose Rapsing Kumand ng BHB Masbate ang nangyaring misengkwentro sa pagitan ng mga tropa ng nag-ooperasyong Scout Ranger at ng tropa ng 22nd IB at mga CAFGU sa Brgy Balete sa bayan ng Aroroy noong Hulyo 31. Tatlo ang patay sa mga sundalo at nawawala ang isa pang sundalong nakilalang si Pfc Corpuz.

Sugatan sa naturang misengkwentro ang apat na myembro ng CAFGU. Nakilala ang tatlo na sina Sonny Serafin, Jig Laurio, at isang may apelyidong Huelba.

Iniulat ng JRC na demoralisado ang mga tropa ng militar at labis na praning dahil sa sunud-sunod na bigwas sa kanila



ng mga pulang mandirigma na tuluy-tuloy na nagsasagawa ng mga operasyong haras, isnayp, at ambus sa mga nag-ooperasyong militar. Ang nabanggit na misengkwentro ay resulta ng kahinaan sa komunikasyon sa kanilang hanay, napagkamalan ng mga nag-ooperasyong Scout Ranger na kanilang mga kalaban ang mga CAFGU at myembro ng 22nd IB na agad nilang inasolt at pinaputukan.

Katulad ng dati nilang mga kapalpakan, tinangkang ilihim ng pamunuan ng 901st Brigade at 9th Infantry Division ang misengkwentro upang di-mapahiya, ngunit naungkat ang balitang ito nang magpaabot sa isang istasyon ng radyo ang isang concerned na sibilyan.

Tikom na naman ang mga bibig ng pamunuan ng AFP at PNP sa rehiyon at walang nais magsalita sa kanila, at maging ang mga tagapagsalita ng PNP at AFP-CRS ay di na makausap ng mga taga-midya.

S

Mga Sibilyan ang Pinagbalingan ng mga Militar, Pagkatapos ng Labanan sa Baras, Catanduanes

Hinaras ng isang team ng pulang mandirigma ang tropa ng 65th IB-Philippine Army sa Brgy Tilod, Baras, Catanduanes nitong Oktubre 6. Bandang alas-dyes ng umaga nang paputukan ng mga pulang mandirigma ng Nerissa San Juan Command ang tinatayang lampas sa anim na sundalo na nakasakay sa isang pansibilyang trak. Galing sa combat operations ang mga sundalo. Kabilang sa mga nasugatan sa pangyayari ang upisyal na si 2Lt Edward Dompol, Private First Class Antonio, Pfc Kelvin Dolor, Pfc David Obispo Jr, at Pfc Juanan. Namatay sa labanan si Private Dytiangco ng 65th IB. Ligtas namang nakaatras ang mga pulang mandirigma. Walang kaswalti sa panig ng BHB.

Humihingi ng paumanhin at nakikidalamhati ang Nerissa San Juan Command sa pamilya ng dalawang sibilyan na nakasakay sa trak na nadamay sa nabanggit na labanan. Lubos na pinapahalagahan ng BHB ang kapakananan ng mga sibilyan. At muli naming ipinapaalala na umiwas ang mga sibilyan sa pagsakay sa mga behikulo na ginagamit ng militar sa operasyon.



Sa sobrang galit ng mga militar dahil sa natamong kaswalti, iligal na inaresto ng mga sundalo ang lahat ng kalalakihan sa katabing baryo ng Batolinaw, binugbog ang mga ito at dinala sa kampo ng Alpha company sa Virac, Catanduanes noong Oktubre 6.

Nitong Oktubre 7, alas-kwatro ng hapon, iligal na hinalughog ng mga sundalo ang lahat ng bahay sa Brgy Sta. Maria sa bayan ng Baras. Iligal ding hinalughog ang mga bahay nina Dennis Rojas ng Brgy Paniquihan, at Brgy Kapitan Adul Icaranom ng Brgy Macutal. Hinalughog din ang bahay at tinutukan ng baril si Arlene Fabia ng Brgy Rizal. Matapos halughugin ang bahay ni Soledad Taniegra ng Brgy Caragumihan, kinuha pa ng militar ang simcard ng anak nitong dalaga. Tinutukan ng baril at pagkatapos ay kinuha ang dalawang selpon ng mga sibilyang sina Araceli Taniegra at Elmer Taniegra na nakatira sa Brgy Osmena, Baras.

S

Kontrarebolusyonaryong PNP, Pinarusahan

Masbate— Ipinataw ng isang tim ng partisano sa ilalim ng Jose Rapsing Kumand ang pamamarusa sa pusakal na pulis na si PO3 Joel Eser sa bayan ng Pio V. Corpuz noong Agosto 5.

Si PO3 Eser ay masugid na giya sa mga operasyon laban sa BHB, aktibo sa paglalata ng intel network sa mga baryo laban sa rebolusyonaryong kilusan, nangungotong sa maliliit na mangingisda at maraming kaso ng pambubugbog sa masa. Protektor din si Eser ng iligal na mga aktibidad ng mga sindikato sa bayan ng Pio V. Corpuz.



Isinakatuparan ang pamamarusa sa lugar na may 200 metro lamang ang layo sa Municipal Police Station. Nasamsam ang dalawang magasin ng kalibre .45 pistola at maraming bala. Hindi nakuha ang service firearm nito.

S

Isang Iskwal ng 2nd IB, Inambus

Sorsogon— Tinambangan ng isang yunit ng Celso Minguez Kumand ng BHB ang isang iskwal ng Charlie coy ng 2nd IB sa Brgy Villareal sa bayan ng Gubat noong Abril 18.

Bente minutos lamang ang aktwal na labanan. Nasamsam mula sa Philippine Army ang dalawang M16 armalayt.

S

Mapaminsalang El Dore Mining Corporation, Pinarusahan ng Hukumang Bayan

Isinagawa ng Armando Catapia Command ang sangsyon o hakbang pamamarusa sa El Dore Mining Corporation - isang korporasyong Australyano - na may proyektong mina sa Sityo Nalisbitan, Bgy. Domagmang, Labo, Camarines Norte. Tugon ito ng Bagong Hukbong Bayan sa inisyung Order of Confiscation ng Hukumang Bayan para sa El Dore. Tugon din ito sa panawagan ng Partido Komunista ng Pilipinas na labanan at parusahan ang mga transnasyunal at multinasyunal na korporasyon, partikular sa pagmimina.

Batayan ng Order of Confiscation ang patuloy na paggahasa ng El Dore sa kalikasan, ekonomiya at buhay ng mamamayan ng Nalisbitan at paligid nito.

Bagamat nababantayan ng mga armadong guwardya ang El Dore, kalakhan sa mga empleyado nito ay sibilyan. Bukod pa rito'y kabahayan ang nakapalibot sa mining site. Ito ang naging mayor na konsiderasyon sa pagsasagawa ng aksyong militar ng mga kasama. Naging maselan ngunit masinsin ang paniktik at paghahanda.


Ang plano - magsasagawa ng reyd na walang putok para paralisahin ang operasyon ng El Dore at makasamsam ng mga baril at kagamitan habang tinitiyak ang kaligtasan ng mga sibilyan.

Kinuha ng mga kasama ang "patay na oras" – panahon pagkatapos ng tanghalian kung kailan ang mga empleyado ay namamahinga o abala sa loob ng opisina at ang mga masa ay nasa kani-kanilang mga bahay – para makalapit ang mga kasama sa target nang di agad naoobserbahan.

Alas dos ng hapon, Oktubre 3, isinagawa ang reyd na estilong lalang. Nagpanggap na mga elemento ng 31st IB ang isang yunit ng BHB. Agad nakapasok sa gate ng administration building ang mga

kasama at nakontrol ang mga tao sa loob nito. Hindi na nagtangkang manlaban ang mga gwardiya nang magpakilalang NPA ang tropa. Agad inilabas ang mga baril na isyu sa kanila. Pumakat naman ang isa pang yunit ng BHB sa United Philippines Drilling (UPD), ang kumpanyang nagsasagawa ng paghuhukay para sa eksplorasyon sa mina. Agad ding nakontrol ang drilling.

Nakumpiska mula sa mga gwardiya ang 11 shotgun, tatlong kal. 38, isang kal. 45, isang 9mm, at mga bala. Nakasamsam din ng pitong laptop kompyuter, isang cpu ng kompyuter, pitong radyong vhf, isang hf radio base at iba pang gamit opisina at elektroniko.



Sinira ng mga operatiba ng reyd ang mga pasilidad ng minahan. Gamit ang mga command detonated na eksplosibo, pinasabog ang drilling

equipment ng upd, dalawang pick-up truck, isang trak, at isang bulldoser. Tiniyak munang walang sibilyan sa malapit ng mga pasasabuging pasilidad bago isinagawa ang pag-blast ng mga bomba.

Kasabay ng reyd ay gawaing propaganda sa mga empleyado ng El Dore at UPD tungkol sa layunin ng pamamarusa sa kumpanya. Nilinawan rin ang masa sa Nalisbitan na ang aksyong isinagawa ay tugon ng hukbo sa hangad ng masa na bigyang katarungan ang pagwasak ng El Dore sa kabuhayang sila ang unang naglinang.

Ligtas na nakaatras ang mga kasama, dala ang mga nasamsam, bagong karanasan, mga aral, at higit sa lahat ang pasasalamat ng mga mamamayan sa Nalisbitan.

S

Sa Piling ng Masa

Ang tatlong sunud-sunod na bagyong dumaan sa bansa noong huling kwarto ng nakaraang taon ay matinding nanalasa sa rehiyong Bikol. Malubha ang pinsalang idinulot nito sa industriya ng niyog. Tinatayang aabot ng mahabang panahon bago ito makabangon. Pinalala pa ang ganitong kalagayan ng mahabang tagtuyot. Setyembre na, ngunit nananatiling mailap ang tag-ulan. Kaya naman, lalo pang lumala ang dati nang mahirap na kalagayan ng magsasaka. Mas ramdam ang malawakang kahirapan at gutom. Kung may pinagkukunan man ang mamamayan ng kaunting kabuhayan bago dumating ang bagyo, ngayon ay salat na salat na.

Napipilitang makipagsapalaran sa syudad ang mga ama, o ina, kung hindi man ay ang mga nakatatandang kapatid. Kahit 13 anyos pa lamang, lumuluwas na ang mga kabataan sa syudad para maghanap ng trabaho. Karamihan sa mga tatay ay pumapasok bilang *construction workers*. Ang mga nanay naman ay namamasukan bilang yaya o katulong sa bahay. Mga panandaliang paraan ito para magkaroon ng panustos sa pang-araw-araw


habang wala pang maaasahang produkto mula sa lupa.

Totoong gutom ang aabutin kung hindi gagawan ng paraan ang ganitong sitwasyon. Nananatiling atrasado ang agrikultura sa pangkabuuan. Bagsak ang industriya ng niyog na pangunahing produkto mula sa Kabikulan. Walang imprastraktura para masustine ang mga palayan dahil kadalasang wala namang irigasyon sa lugar. Nasa ika-21 siglo na, pero ang agrikultura ng Pilipinas ay lubhang nakaasa pa rin sa ulan.

Hindi rin kaila ang kawalan ng suportang pinansyal, materyal at teknikal sa agrikultura ng reaksyunaryong gubyerno mula noong umpisa pa. Malaking porsyento ng badyet nito ay awtomatikong napupunta sa pagbabayad utang at sa militar. Hindi pagkain, kundi bala ang prayoridad ng reaksyunaryong gubyerno. Pati mga naaprubahang *calamity funds* ay pampabango lang sa midya. Nauuwi lamang ito sa korapsyon ng mga upisyal sa gubyerno at katiting lang ang nakakaabot pa sa mamamayan.

Ang mahabang tagtuyot ay lubhang nakapagpalala sa abang kalagayan ng mamamayan. Ang inaasahang tag-ulan ay hindi dumarating. Sa halip na makapagsimula na sa pagtatanim, nananatiling nakatiwangwang ang lupa. May panaka-naka ngang pag-ulan, dulot ng *low pressure*, pero hindi ito sustenido. Marami nang kaso na nakapagsimula nang mag-araro ang mga magsasaka at naihanda na rin ang mga dalugi pero natuyo lang ang mga ito. Ang iba naman ay nakapagtanim na ng palay, pero nanganganib na mangamatay ang pananim dahil sa kawalan ng patubig. Nadu-doble tuloy ang pagod, at nauubos lang ang rekurso ng magsasaka. Kaya lalapit na naman sila sa usurero para sa mga kagyat na gastusin.

sundan sa pahina 14



Diwang Rebolusyonaryo

Bagamat may umiiral na palitan ng lakas-paggawa sa mga grupo ng magsasaka, nahihirapan itong ipagpatuloy dahil sinasamantala ng bawat isa ang mga panaka-nakang ulan para asikasuhin ang kanya-kanyang taniman. Kaya gayon na lamang ang pagsisikap ng mga kasama na mariing hikayatin ang luyu-luyo. Sa maraming pagkakataon, aktibong lumalahok sa produksyon ang mga kasama. Sa isang baryo sa Sorsogon, nasaksihan namin ang isang iskwad ng mga kasama ang tumulong para maggamas, mag-araro at mag-ani ng kamote. Hindi alintana ang init, may kanya-kanyang bahagi ang bawat isa. Ang iba ay naggamas, ang iba ay nag-araro ng kamotehan, samantalang nag-aani naman ang iba. Isang araw lamang ang ginugol dito para maihanda ang isang parsela ng lupa para sa pagdating ng tag-ulan.


Para kagyat na makatugon sa kasalatan ng tubig, isa sa naging proyektong pinagtulungan ng organisasyong masa at mga kasama ang pagsasaayos ng dating irigasyong nasira ng bagyong Reming. Tumulong ang hukbo sa pagpapalano ng proyekto at ilang bahagi ng implementasyon. Samantala, ang masa naman ang nagsikap magpalitaw ng materyales tulad ng semento na kailangan sa pagkukumpuni ng *irrigation canal* na magtitiyak ng sapat na tubig sa ilang

ektaryang palayan. Mahigit labinlimang katao ang lumahok sa tatlong araw na sama-samang paggawa. Higit sa labinlimang pamilya ang kasalukuyang nagtatamasa ng pakinabang sa proyektong ito. Laging tinitiyak ng mga kasama ang aktibong paglahok ng mga benepisyaryo para pangalagaan, protektahan at magmalasakit sa proyekto.

Sa isang pagkakataon naman, sa karatig-sityo, tumulong ang mga kasama sa pag-aararo at pagtanim ng palay. Isang araw rin ang ginugol ng mga kasama sa pagtulong sa pagtanim. Bagamat maliit na kontribusyon, lubhang ikinagalak ng masa ang partisipasyon ng mga kasama. Kaya gayon na lamang ang labis na pag-aantabay at laging mainit na pagtanggap at pag-aalaga ng masa tuwing dumarating ang kanilang hukbo.

Bahagi ito ng minimum na programa sa rebolusyong agraryo na ipinapatupad ng kilusan. Bagamat hindi pa ganap ang tagumpay, ngayon pa lang ay tinitiyak na ang iba't ibang antas ng kooperasyon na kayang abutin ng organisasyong masa. Sa mga lugar na hindi pa nailulunsad ang palitan ng lakas paggawa, aktibong lumalahok ang mga kasama para pangunahan ito. Pinapaunlad na lamang ito sa mga susunod na panahon, depende sa antas ng pulitika at kahandaan ng masa. Ang organisasyong masa ang pangunahing daluyan ng mga programa sa rebolusyong agraryo na ipinapatupad ng kilusan.

Ang paglahok sa produksyon ay isang mahalagang gawain ng hukbo para itaguyod ang kapakanan ng masa. Sa kabila ng papatinding militarisasyon ng rehimeng Arroyo, naipagpapatuloy pa rin ng rebolusyonaryong kilusan ang mga proyekto nito para sa pagpapaunlad ng kabuhayan ng masa. Pinapatunayan lamang nito na hindi bala ang tugon sa karaingan ng masa.





BATOP



Hmp!



Pesteng SOT
kang militar
na 'yan!



Pag nagbalik pa sinda,
remate sinda sa mga Kasama!



S